

Wale Walioandikwa katika Kitabu cha Uzima,

Kutakuwako na wakati wa taabu, mfano wake haukuwapo tangu lilipoanza kuwapo taifa hata wakati uo huo; na wakati huo watu wako wataokolewa; kila mmoja atakayeonekana ameandikwa katika kitabu kile. Danieli 12:1.

Kadiri tunavyokaribia hatari za siku za mwisho, majaribu ya adui yanakuwa makali na ya kudhamiria zaidi. Shetani ameshuka akiwa na nguvu kuu, akijua kwamba anao muda mfupi; na anafanya kazi “katika madanganyo yote ya udhalimu kwa hao wanaopotea.” Onyo linatolewa kwetu kupitia neno la Mungu, kwamba, kama ingewezekana, angewadanganya hata yumkini walio wateule.

Matukio ya kustaajabisha hivi karibuni yatatokea ulimwenguni. Mwisho wa mambo yote unakaribia. Wakati wa taabu umekaribia kuwajia watu wa Mungu. Ndipo amri ya kuogofya itatangazwa kwa wote wanaoitunza Sabato ya Bwana kuwakataza wasiuzi wala kununua, na kuwatishia kwa adhabu na hata kifo, ikiwa hawataitunza siku ya kwanza ya juma kama Sabato.

“Wakati huo Mikaeli atasimama, jemadari mkuu, asimamaye upande wa wana wa watu wako; na kutakuwa na wakati wa taabu, mfano wake haukuwapo tangu lilipoanza kuwapo taifa hata wakati uo huo; na wakati huo watu wako wataokolewa; kila mmoja atakayeonekana ameandikwa katika kitabu kile.” Kupitia aya hii tunaona umuhimu wa majina yetu kuandikwa katika kitabu cha uzima. Wale wote ambao majina yao yameandikwa humo wataokolewa kutoka katika mamlaka ya Shetani na Kristo ataamuru kwamba mavazi yao machafu yaondolewe na wavikwe haki Yake. “Nao watakuwa wangu, asema BWANA wa majeshi katika siku ile niifanyayo; naam, watakuwa hazina yangu hasa; nami nitawaachilia, kama vile mtu amwachiliavyo mwanawe mwenyewe amtumikie.”

Katika wakati wa taabu, shetani anawachochea waovu, nao wanawazingira watu wa Mungu ili kuwaangamiza. Lakini hajatambua kwamba “msamaha” umekwisha andikwa mbele ya majina yao katika vitabu vya mbinguni. Hajatambua kwamba amri imekwisha kutolewa “wavueni nguo hizi zenye uchafu” muwavike “mavazi ya thamani nyingi,” na kuwafunga “kilemba kizuri” vichwani mwao.

Ahadi aliyopewa Joshua wanaahidiwa masalia wote wa Mungu: “kama ukienda katika njia zangu si katia njia zako mwenyewe, na kama ukishika maagizo yangu, ndipo utakapoihukumu nyumba yangu, nawe utazilinda nyua zangu, nami nitakupa nafasi ya kunikaribia kati yao wasimamao karibu.” Ni akina nani hawa wasimamao karibu? Ni malaika wa Mungu. Macho yetu yangeweza kufunguliwa kama ya yule mtumishi wa Elisha kule Dothan, tungeweza kuona malaika waovu wakituzunguka pande zote, wakijaribu kutusogelea na kutafuta nafasi ya kutujaribu na kutuangusha; tutawaona pia malaika watakatifu wakitulinda na kwa mwangaza na nguvu zao wakiwasukuma kurudi nyuma malaika waovu (**Historical Sketches, 155, 156**).